



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-I/25-3-40-213-6/21**
Datum: **20.08.2021. godine**

„Agencija za vodno područje rijeke Save“ Sarajevo rješavajući po zahtjevu pravnog lica „FI&CO“ d.o.o. Ključ, za izdavanje vodne dozvole za ispuštanje tehnoloških otpadnih voda iz poslovnog objekta za otkup, tretman solima i distribuciju sirove kože sa administrativnim prostorijama, te sa vanjskog prostora za pranje vozila – kamiona, na osnovu člana 109. stav (1) tačka 2. , člana 139. stav (1) tačka 3. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98 i 48/99), donosi:

R J E Š E N J E **o vodnoj dozvoli**

1. Daje se vodna dozvola Investitoru „**FI & CO**“ d.o.o. Ključ, za ispuštanje tehnoloških otpadnih voda iz poslovnog objekta za otkup, tretman solima i distribuciju sirove kože sa administrativnim prostorijama, te sa vanjskog namjenskog prostora za pranje vozila – kamiona, lociranog u Hanlovskoj ulici bb, općina Ključ, izgrađenog na zemljištu označenom kao k.č. broj 1166/1, 1166/2, 1166/3, 1167 i 1168, upisanim u posjedovni list br. 174, K.O. Ključ I, općina Ključ.
2. Ova vodna dozvola se odnosi isključivo na ispuštanje tehnoloških otpadnih voda za predmetni poslovni objekt za skladištenje, tretman solima i distribuciju sirove kože definisan tačkom 1. ovog rješenja i ne oslobađa podnosioca zahtjeva obaveze pribavljanja vodne dozvole za korištenje vode i ispuštanje sanitarnih otpadnih voda, za čije je izdavanje nadležno Ministarstvo poljoprivrede vodoprivrede i šumarstva Unsko-sanskog kantona, u skladu sa članom 139. stav 2. tačka 1. i 2. Zakona o vodama.
3. Vodna dozvola se daje na osnovu činjeničnog stanja utvrđenog pregledom dostavljenje dokumentacije i izvršenim uviđajem na objektu, pod slijedećim uslovima:
 - 3.1. Da korisnik objekta otkupne stanice sirove kože sa pratećim sadržajima „FI&CO“ doo Ključ, u toku važenja ovog Rješenja prema dostavljenoj revidiranoj dokumentaciji izvedenog stanja, isti održava u funkcionalnom stanju i koristi u skladu sa uslovima iz ove vodne dozvole.
 - 3.2. Da sklopi ugovor o pražnjenju sadržaja ukopane ležeće posude (vodoodrživog rezervoara) za prijem tehnoloških otpadnih voda sa ovlaštenim licem za zbrinjavanje opasnog otpada. Objekte za prikupljanje, tretman i ispuštanje onečišćenih otpadnih voda (slivnici, rešetke, kanalizaciona mreža, separator ulja i masti, i dr.) potrebno je održavati i koristiti na takav način koji će obezbijediti njihovu potpunu ispravnost i funkcionalnost. Čišćenje i pražnjenje uređaja za tretman otpadnih voda, odnosno separatora ulja i masti, može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja taložnika i separatora ulja i masti, kao i taložnika za otopine upotrijebljene soli, neophodno je voditi službenu evidenciju i arhivu.

- 3.3. Da se istrošena ulja, nauljene krpe i sav opasan otpad koji se koristi u procesu čišćenja i održavanja objekta i postrojenja redovno prikuplja i popisno, privremeno skladišti u spremnike zasebno odvojene i označene, do krajnjeg, ekološki prihvatljivog zbrinjavanja od strane ovlaštene organizacije, a prema sačinjenom ugovoru,
 - 3.4. Da se skladištenje soli i drugih materija za konzerviranje, kao i materija za sanitaciju, vrši na način da se onemogućí dospijevanje istih u površinske ili podzemne vode,
 - 3.5. Da korisnik predmetnog objekta, za vrijeme trajanja ove dozvole, obezbjeđuje da se otpadne tehnološke vode koje nastaju u dijelu objekta namijenjenog za deponiranje i grubi tretman sirove kože te prostora namijenjenog za sanitaciju vozila i skladištenje soli odvođe do objekta za prihvat i tretman klorida - otopina soli iz tehnološkog procesa, pH vrijednost, BPK₅, KPK-Cr, suspendovane materije, ukupni P, ukupna ulja i masti, ukupni N, te test toksičnosti 48LC50 > 50%, a onečišćene oborinske vode sa saobraćajnih i manipulativnih površina nesmetano sakupljaju i odvođe do objekta predviđenog za tretman zauljenih oborinskih voda, a zatim tretirane vode ispuštaju u recipijent,
 - 3.6. Prečišćene tehnološke otpadne vode moraju ostati u maksimalno dopuštenim granicama definiranim Prilogom 14. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20 i 96/20),
 - 3.7. Samo oborinske vode sa krovova se mogu bez prečišćavanja ispustiti u recipijent,
 - 3.8. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji. Uzorkovanja otpadnih voda obaviti iz okna za monitoring (mjerna mjesta definisana projektnom dokumentacijom iz tačke 3.1. pobrojanje u obrazloženju rješenja).
 - 3.9. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 5. U periodu važenja ove dozvole, Investitor „FI & CO“ d.o.o. Ključ je dužan provoditi sve mjere i aktivnosti propisane istom.
 6. Ukoliko radom predmetnog objekta dođe do promjene režima površinskih ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
 7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom objektu e obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
 8. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvjestiti nadležne

organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.

9. U ovoj upravnoj stvari plaćene su sve upravne pristojbe,
10. Prava stečena po ovoj dozvoli ne mogu se prenositi na treća lica.
11. Ova vodna dozvola, shodno Uredbe o uslovima ispuštanja otpadnih voda u okoliš i sisteme javne kanalizacije se daje sa rokom važenja od 5 godina, od dana pravosnažnosti ovog Rješenja.
12. Prije isteka važnosti ove dozvole, Investitor je dužan da podnese zahtjev za izdavanje nove vodne dozvole.

O b r a z l o ž e n j e

Investitor, „**FI & CO**“ d.o.o. Ključ, obratio se ovoj Agenciji dana 10.05.2021. godine sa zahtjevom za izdavanje vodne dozvole za ispuštanje tehnoloških otpadnih voda iz poslovnog objekta za otkup, tretman solima i distribuciju sirove kože sa administrativnim prostorijama, te vanjskog namjenski urađenog betonskog platoa za pranje vozila – kamiona, lociranog u Hanlovskoj ulici bb, općina Ključ.

U provedenom postupku, uz zahtjev za izdavanje vodne dozvole dostavljena je i pregledana slijedeća dokumentacija:

- Ovjerena kopija Rješenja o izmjeni podataka, broj: 017-0-Reg-17-000058, izdanog dana 27.01.2017. godine, od strane Općinskog suda u Bihaću,
- Ovjerena kopija Uvjerenja o poreznoj registraciji, izdanog dana 10.01.2013. godine, od strane Federalnog ministarstva finansija, Porezne uprave Federacije BiH – Kantonalni porezni ured Bihać,
- Ovjerena kopija Uvjerenja o registraciji/upisu u Jedinostveni registar obveznika indirektnih poreza, broj: 04/1-UPJR/1-3352-2/09, izdanog dana 02.07.2009. godine od strane Uprave za indirektno – neizravno oporezivanje Banjaluka,
- Kopija uplatnice upravne pristojbe,
- Ovjerena kopija Ugovora o izvođenju radova, zaključen sa „DELTA PETROL“ d.o.o. Kakanj, dana 09.12.2020. godine, pod brojem 1985/20-DS,
- Ovjerena kopija Ugovora o pružanju komunalne usluge vodosnabdijevanja između „FI&CO“ doo Ključ i JP „UKUS“ doo Ključ, broj 174-1/17 od 10.05.2017. godine,
- Ovjerena kopija Rješenja, kojim se utvrđuje da objekat „Otkupna stanica „FI & CO“ d.o.o. Ključ, na lokaciji Hanlovska bb, Općina Ključ u pogledu izgradnje, tehničkog uređenja, stručnog kadra, opreme i higijene ispunjava veterinarsko-zdravstvene uslove kao uvoznio-izvozni objekat; izdanog od strane Federalnog ministarstva poljoprivrede, vodoprivrede i šumarstva, pod brojem UP-I-06-2-24/17-1049-3/15 Č.N., dana 02.08.2015. godine, u Sarajevu,
- Kopija Vodne dozvole broj UP-I/25-3-40-061-5/19 od 08.05.2019. godine izdata od strane AVP rijeke Save , Sarajevo,
- Ovjerena kopija Rješenja o vodnoj dozvoli, kojim se daje vodna dozvola investitoru d.o.o. „Otkupna stanica FI CO“ Ključ za korištenje i ispuštanje otpadnih – sanitarnih voda iz poslovnog objekta za otkup i distribuciju sirove kože nalazećeg u zakupljenom privrednom objektu „Fabrika Hanlovska vrelo“ u Ključu; izdanog od strane Općinskog načelnika Općine Ključ, pod brojem 03-23-1-463/13, dana 21.10.2013. godine,
- Kopija Odgovora, kojim sa na zahtjev podnosioca zahtjeva „FI & CO“ d.o.o. Ključ, Ministarstvo za građenje, prostorno uređenje i zaštitu okoliša Unsko-sanskog kantona, izjašnjava da za isti nije potrebna okolinska dozvola, broj 11-23-15031-UP-1/13, od dana 13.11.2013. godine,

- Ovjerena kopija Rješenja kojim se utvrđuje da su izvedeni radovi na izgradnji poslovnih objekata u privredi, fabričke hale u Ul. Hanlovska bb u Ključu izvedeni u skladu sa projektnom dokumentacijom na osnovu koje je izdato odobrenje za građenje te da se isti mogu koristiti, izdano od strane Službe za prostorno uređenje, stambeno-komunalne, imovinsko-pravne i geodetske poslove i katastar nekretnina Općine Ključ pod brojem 03-23-3-407/11 dana 07.09.2011. godine,
- Dopuna Projekta vanjskog uređenja – hidro faza, objekta otkupna stanica sirove kože pravnog lica „FI&CO“ Ključ, urađena od strane ovlaštenog pravnog lica „ZIBL“ –Zavod za izgradnju Banja Luka, juna 2021. godine u Banja Luci,
- Izvještaj o kontroli tehničke dokumentacije – dopune Projekta o ispuštanju tehnoloških otpadnih voda; urađenog od strane „PROJEKT“ a.d. Banjaluka, pod brojem 683/21, dana 30.06.2021. godine, u Banjaluci,
- Zaključak o visini i roku za plaćanje posebnih troškova, izdan od strane Agencije za vodno područje rijeke Save, pod brojem UP-I/25-3-40-213-4/21, dana 04.08.2021. godine u Sarajevu, te uplatnica za iste,

Nakon pregleda dostavljene dokumentacije, u skladu sa članom 21. stav 5. Pravilnika o sadržaju, obliku, uvjetima i načinu izdavanja i čuvanja vodnih akata („Službene novine Federacije BiH“ broj 06/08), izvršen je pregled izgrađenog poslovnog objekta za otkup i distribuciju sirove kože sa administrativnim prostorijama „FI & CO“ d.o.o. Ključ, i tom prilikom sačinjen zapisnik o uviđaju broj: UP-I/25-3-40-213-5/21 od 18.08.2021. godine.

Poslovni objekt za otkup i distribuciju sirove kože sa administrativnim prostorijama „FI & CO“ d.o.o. Ključ, je lociran u Hanlovskoj ulici bb, općina Ključ, sa lijeve strane magistralne ceste M - 5, a kojem se prilazi nekategorisanim asfaltnim putem za Hanlovsko brdo, u dužini cca 100 metara. Objekt se nalazi cca 200 metara udaljen od vodotoka Hanlovskog potoka.

Otkup i distribucija sirove kože se vrši u objektu proizvodne hale, sa pripadajućim ekonomskim dvorištem ispred iste. Ekonomsko dvorište je dijelom asfaltirano a dijelom tamponirano i pripremljeno za asfaltiranje. Pod u proizvodnoj hali je AB temeljna kotsruktivna ploča.

Dovezena koža se važe, te prebacuje na prostor za soljenje i pregled. Nasoljena koža se ostavlja da odleži dvije do tri sedmice, a većinom se doprema već konzervirana koža namijenjena izvozu. Potom se ista mota i slaže na dimenzije euro palete do težine 1-1,2 tone. Palete se potom viljuškarem utovaruju na prethodno pripremljen kamion za odvoz kože. Pripreme se odnose na dezinfekciju, najlonsku zaštitu podnice te posip piljevine.

Sol koja se koristi u postupku soljenja se drži uskladištena unutar i izvan prostora hale u PVC vrećama težine 50 kilograma.

Sanitarne otpadne vode iz objekta upravne zgrade su kanalizacionim cijevima sprovedene do septika, čiji je preliv spojen na gradsku kanalizacionu mrežu.

Oborinske vode sa krovova su sistemom horizontalnih i vertikalnih oluka sprovedene do revizionih šahtova, a potom u vodotok Hanlovskog potoka.

Oborinske vode koje mogu biti zauljene naftnim derivatima sa prostora ekonomskog dvorišta se slijevaju na internu asfaltiranu komunikaciju. Ista se slijeva u ulične slivnike, te kanalizacionim cijevima odvodi na tretman na separator ulja i masti (nedovoljnog kapaciteta), čiji je preliv spojen na gradsku kanalizacionu mrežu. Zauljene vode sa parkirnih površina se slijevaju u okolni prostor bez tretmana.

Otpadne zasoljene vode koje se dobiju u postupku soljenja i skladištenja sirove kože unutar proizvodne hale se kanalicama odvede preko taložnika do separatora ulja i masti, čiji preliv je spojen na gradsku kanalizacionu mrežu, odnosno posredno na vodotok Hanlovskog potoka.

Do momenta izvršenja terenskog uviđaja vršeno je mjerenje kvaliteta otpadnih tehnoloških voda, čiji su rezultati u skladu sa dozvoljenim vrijednostima propisanih Uredbom.

Na osnovu dostavljene dokumentacije, utvrđenog činjeničnog stanja nakon provedenog postupka konstatuje se da je podnosilac zahtjeva, „FI & CO“ d.o.o. Ključ, ispunio minimum uvjeta za izdavanje vodne dozvole, kako je to regulisano članom 115. do člana 118. Zakona o vodama („Službene novine Federacije BiH“, broj 70/06) i članom 12. i 13. Pravilnika o sadržaju, obliku i uvjetima izdavanja i čuvanja vodnih akata („Službene novine Federacije BiH, broj 31/15, 55/19 i 41/20) i odredbama članova 3. i 15. Uredbe o uslovima ispuštanja otpadnih voda u okoliš i sisteme javne kanalizacije te je riješeno kao u dispozitivu ovog rješenja.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07).

Podnosilac zahtjeva je na ime izdavanja ovog vodnog akta izvršio uplatu Upravne pristojbe po Zakonu o upravnim pristojbama i Tarifi federalnih upravnih pristojbi („Službene novine Federacije BiH“, broj 06/9, 8/00, 45/10 i 43/13), u korist Računa javnih prihoda federalnog budžeta.

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno, usmeno na zapisnik ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta
Fuad Mujagić, dipl. inž.

**Po ovlaštenju
Rukovodilac sektora za izdavanje
vodnih akata**



Haris Ališehović, dipl. inž. građ.

Dostaviti:

- „FI & CO“ d.o.o. Ključ, Rudenice bb, 79 280 Ključ
- AVP Sava, ISV – Vodna knjiga
- Sektor 50
- Sektor 40, arhiva
- Oglasna ploča